



Communicaziun a las medias

Purschidas da sustegn multifaras per personas en il Grischun

A la radunanza generala dals 3 da zercladur rapporta la Crusch Cotschna Svizra Grischun davart ils eveniments da l'onn 2024. President Hans Geisseler preschenta la purschida per personas en situaziuns da vita difficilas en il chantun ed engrazia a las voluntarias ed als voluntaris, a las collavuraturas ed als collavuratur, a las commembras ed als commembers, a donaturs, ad autoritads sco er als partenaris per lur sustegn en il servetsch da l'umanitad.

Il rapport annual 2024 da la Crusch Cotschna Svizra Grischun sa concentrescha sin l'idea directiva «Per dapli umanitad». Umans en situaziuns da vita difficilas èn dependents dal sustegn da lur famiglias, da lur ambient, da lur patrinas e patrins da lavur sco era da la societad. La Crusch Cotschna Svizra Grischun s'engascha en moda multifara per sustegnair personas vulnerablas e facilitar il mintgadi.

Umanitad en il mintgadi – sustegn che ha effect

Las purschidas da sustegn en il mintgadi, da la furmaziun, da la sanadad e da l'integraziun sociala han la finamira da stabilisar e megliar situaziuns difficilas, promover la participaziun sociala e l'egualitad da las schanzas sco era da rinforzar las cumpetenzas professunalas e persunalas. L'onn passà han bleras personas survegnì sustegn: 1'593 famiglias en purschidas da sustegn en il mintgadi, 885 personas en cussegliaziuns spezialisadas u 2'996 pazientas e pazients en l'ergoterapia. 1'270 participantas e participants han rinforzà lur cumpetenzas en purschidas da furmaziun per la tgira e per l'assistenza.

En acziun cun cor ed umanitad

Il sustegn prezius da las voluntarias ed ils voluntaris stat en il center da bleras purschidas. Las personas voluntarias s'engaschan en 14 differents champs d'acziun – lur contribuziun è impressiunanta ed indispensabla. Il president Hans Geisseler engrazia a las 482 voluntarias e voluntaris, che furman cun lur 31'129 uras da servetsch ina pitga fundamentala da l'activitad da la Crusch Cotschna Svizra Grischun. El engrazia medemamain a las collavuraturas ed als collavuratur, a la suprastanza, a las commembras ed als commembers, a las faaturas ed als fauteurs sco er als partenaris da l'economia e da la politica per lur engaschament. Ensemen han els facilità il mintgadi da bleras personas en il Grischun ed han pussibilità ina bilantscha impressiunanta da l'umanitad.

Novas purschidas tar la Crusch Cotschna Svizra Grischun

La Crusch Cotschna Svizra Grischun concepescha sias purschidas tenor ils basegns da personas en situaziuns da vita difficilas. In access simpel e nunbirocratic a questas purschidas è ina finamira centrala da la Crusch Cotschna Svizra Grischun. Durant l'onn da rapport è vegnì inizià en il sector da la migraziun la purschida d'inscunter e d'infurmaziun «connect». Il project sa drizza a fugitivas e fugitivs che vivan en alloschis collectivs en regiuns periferias. La Crusch Cotschna Svizra Grischun porscha differentas activitads, promova l'interacziun tranter las fugitivas ed ils fugitivs e la cuminanza locala e metta a disposiziun las infurmaziuns accessiblas independentamain. Questa purschida vegn realisada en collavuraziun e cun il sustegn finanziel dal Post spezialisà per integraziun dal Grischun.

En il sector sustegn en il mintgadi è vegnì introducì il 2024 il Digital-Café. En collavuraziun cun las scolas medias grischunas porscha la Crusch Cotschna Svizra Grischun en diversas regiuns radund ina giada il mais cussegliaziuns individualas gratuitas tras giuvnas voluntarias e giuvens voluntaris. Ellas ed els enconuschan las sfidas dal mintgadi digital e



porschan a las visitadras ed als visitaders in sustegn cumpetent en tut las dumondas digitalas.

Las duas novas purschidas vegnan amplifitgadas e sviluppadas vinavant cuntinuadamain.

Cuira, 4 da zercladur 2025